

四庫全書

集部

欽定四庫全書

文恭集卷十二

宋 胡宿 撰

外制

曾公亮可充史館修撰制

敕夫西臺書詔東觀約史三長所寄二職竝華選諸索
從之賢得于綸省之老某奕世學史名家通經體行安
于粹和器用本乎冲厚博我道術執經侍于便朝代予

語言秉筆贊于書命講聞正論不變深辭屬史氏之缺
員思世官之服采惟乃踵向歆之美可以嗣南董之職
噫立言不朽書法無隱傳言後世勉濟前人豈不美歟
尚思勉此

宋祁可依前右諫議大夫充史館修撰制

敕具官某國之大典莫尚于策書世有史官實顯于筆
削思立言于不朽用垂法于將來亶屬耆英迺述作
以爾學通今古文擅宗師識可貫于動微才足經于治

本臯代言于掖省復定草于禁林盤詰之風炳于三代
訓辭之體厚厥二京歷近輔以政成睠邇英之籍舊疇
咨勸講召復近嚴屬撰次之缺員冀選掄之任職絕踰
雋碩參寄編摩制度文章用煥一時之美才流職業更
增二惠之華有若世官實惟家學尚倚敷經之善勿忘
書法之良

王洙可守本官充史館修撰制

敕具官某朕日者祓飾舊章修起宗祀文繁禮緝德厚

流光乃訪雋儒使志盛典思謹合宮之述用垂來世之傳以爾經術深明才辭典茂居邇英勸講之近參東觀討論之勤博洽多通精明適用實膺詔書之舉通覽奏篇之登敘次有條勒成得法有煥緝熙之美用嘉刊述之勞卽太史之書筵正開元之撰職仍侍朕講往踐乃司

孫抃可依前禮部郎中知制誥充史館修撰判館事制

敕史官尚矣歷代有之述春秋五例之餘顓邦國四方之掌必也書法使善惡昭于前其次立言用文采表于後惟是撰著之美則宜俊碩之流具官某篤行直躬高文強學達夷吾治體之要有壺遂君子之風曩從西臺服在禁署視淮南報賜之草作伯禽封拜之書行于諸侯豈惟謨訓之厚置諸太史亦緊職業之長加復同官之僚率取一時之望對執南董之簡遞煥唐虞之文緝熙予猷往踐乃職

傳惟幾可兵部郎中直史館制

敕具官某專使一面將漕之職修稽最貳期疇庸之典
舉有嘉顯迹匪限常規爰命寵甄式頒異數以爾性度
和厚才理幹明早膺選于峻良常肆勤于內外經術飾
事參于儒學之優法令爲師尤號吏資之敏睠言南服
之地簡求外計之臣圖其練更委以按察招綏有序控
帶得宜徭俗底寧邊氓休息方切仗才之寄宜從增秩
之畱進屬中臺佐夏卿之爲政入聯東觀預太史之修

書竝服華峻之資就示褒優之典尚凝來績勿墜前勞
張昇可集賢殿修撰制

敕進書殿之職褒藩翰之良用旌正人且賞稽古具官
某高節特立直躬無徒試之吏文則肅給而無窒任以
網錯則方峻而不回嚮者有司坐以薄罪迫于連茹委
之班條久從外遷頗鬱中議詩不云乎靖共爾位正直
是與爾有直諒多聞之益中立不倚之風始寵麗正之
名別上朱方之計惟是朕意不忘而忠

孫甫可起居舍人制

敕王者言動世有記注雖二史之任差弛而一時之選
愈華非得名流不允清議具官某學精識遠才美行方
辯論有餘介特不撓擢在延閣任之諫垣鯁議讜言未
嘗吐茹清規直質不見緇磷屢易守符再典漕事風政
彌舉器望益嘉差用久勞稍遷右史尚倚將輸之舊就
虔褒擢之恩

錢彥遠可起居舍人直集賢院知諫院制

敕具官某夫納忠之先莫若箴王闕興治之美無如任
諫臣爰推渥茂之恩用獎正方之士質之公論咸曰職
修以爾風識既周才謨兼劭以富平之德器出太伯之
世家紹休前人協比介弟聯對大策著聞本朝數奏其
言咸有補于世務參試以政復無害于吏文嘉其行能
任以言責議論慷慨退公委蛇獻納既勤旌陟宜及古
史之任參記言動麗正之學領校典文舉用二職之華
進增七諍之重爾其勿念後悔無廢前勞審思諸宜勤

補不逮讜言切至朕罔弗焉

李兌可起居舍人同知諫院制

敕具官某夫有言責者思其忠有官守者修其職保氏之任則主進諫右司之業則司書法均是二職皆拾遺補過之臣也自非忠正之士疇勝左右之選以爾莊修有素方介不撓比膺憲屬之選進處臺端之嚴糾肅朝聯切劘治體間陳得失頗見納用有嘉已試之效且酬久次之勞寵以記言委之諫職爾其往服休命數進苦

言深圖薦替之勤勿爲拱默之計周爰補察以竚來忠

陳升之可右司諫制

敕某朕設置諫臣所以箴已闕詢求正論所以廣治道
以爾蔚有文采參以風識更試外服則材彊濟而有餘
察視中司則體端直而無撓比奏方幅數進忠言能切
劘于事經多鐫拂于時病適會諫員之缺超從憲屬之
選往踐厥官亟修乃職至于刑政之得失言動之過差
悉意以聞無有所諱

呂溱可右正言制

敕具官某漢儀以諸吏給事于中唐制以兩省供奉于
內惟是右垣之選則拾禁闥之遺自匪髦良參濟風議
朕未嘗輕以授之以爾神遠而清體重且粹羣繇異等
之舉適置禁林之華參職朱轡再珥彤筆一遷秩于秘
局久藏器于高墉介然有常議者爲滯茲用擢汝置之
諫聯行圖記載之勞勉思獻替之最

李執中可著作佐郎制

敕具官某國家設攷課之法立準才之品較實有狀陟
乃近明進懋以官賞則無濫以爾早中辭策嘗參賓壽
間緣保任之章來稱敏濟之用使幹茗局參預縣章質
其滿歲之勞合于班賞之格京司進秩書省爲清俾升
刊著之華無廢操修之素

呂誨可著作佐郎制

敕某昔爾大父相太宗真宗厥功茂焉惟時穆若以爾
有裔孫之裕策雋科之秀率循士範參試吏文任宰字

而有勞歷終更而無缺監司薦狀鉤覆應條擢佐修書之筵且光名相之闕圖濟前美滋勉來勤

向安可著作佐郎制

敕某本縫衣之流預入彀之選早服名教之樂亦尚文辭之爲幕府參謀首在公匪懈之敏藩房授道有惠訓不倦之勤覽太宗之上言合公車之衆奏在勞可紀于法得遷俾領著于秘丘尚竭誠于親邸

高師說可著作佐郎制

敕某朕以吏員實繁治迹難究故設保任之法委諸按察之官既得公車之章復經選部之覆審若薦狀差以恩遷以爾用軍從事之秩辟在幕府時則留司乃吾舊相薦爾沈密有守強幹克舉一德之重可以取信故特命引對不與他事比擢任京局領佐史筵往慎爾修以永來譽

宋敏修可著作佐郎制

敕某著局有佐隸修書之任故事到職作名臣之傳非

擇才者疇稱官美爾之先正歷居史任爲一時之宗匠
成兩朝之典冊不朽之立厥功茂焉爾承先人能世家
學二惠競爽見推于時來質歲成兼優最日差用陟典
擢預史筵往知朝恩取大門業

張演可著作佐郎制

敕某選部之條黜陟有序清能見拔滯淹者振器乃無
廢才則弗遺以爾少有俊名早中科選家世高于閩錄
閩閱滯于中銓浩然之氣老而彌壯曩隨越絕之檄預

參賓幕之籌薦任交章終更無缺擢佐史筵之著尚緊
文繹之餘虔我茂恩勉而甘節

路保衡蕭汝礪竝可著作佐郎制

敕某等國家以治世之典宜崇寬簡故廷尉之屬必選
仁平爾等階升俊科兼練法學比參府畫亦總縣條徇
公不私以文無害被所知之章薦閱已世之案文悉通
爰書且有比例對遷列署之秩竝居詳讞之曹勉思盡
心以稱朕意

張子方萬槓竝可著作佐郎制

敕某等曩繇賓興早擢科等比會都銓之集屢試吏牒
之煩咸用節尚之修胥被已知之薦治縣著迹幹局有
勞略其往疵攷以今課宜寵秘丘之秩往佐修書之筵
勉推精誠務對恩典

范道卿鄭夔金君卿竝可著作佐郎制

敕某等佐著有局本隸修書令名雖存舊職已廢猶曰
美秩必用清流爾等體行交修才辭參劭竝繇茂士之

選號爲從事之良或賦縣條竝莅局事或因滿課來集都銓竄無尤爲多有慰薦旣合攷法仍中賞科命除此官且申吾信切近朝籍益思官箴

周岐可著作佐郎李昭錫可大理寺丞制

敕某等夫華原濱雍有秦之遺俗故號爲難治趙城近晉染堯之深迹故稱爲易化爾等端莊有立廉敏自將長治二邑之民操決一同之政雖劇易殊貫而功次畧同復有薦任之函合于甄陟之典以文而進佐秘丘之

撰著治經以仕參列卿之丞屬均自清要往哉慎修

陳亢可著作佐郎邢裕可大理寺丞制

敕某等漢之法有最課而得遷晉之令坐優舉而乃陟
國家開薦任之例委監司之官擢敘則精才否尤辨爾
等或用材質之美揚于王庭或以經藝之優縻我人爵
佩縣銅墨爲郡紀綱治有愛利之風官無逋曠之事需
章雜薦選部修聞領著秘丘決平讞寺竝爲磐陸之漸
勿忘風矩之修

周約可著作佐郎郭灝可大理寺丞制

敕某等同升茂士分踐俊科比沿牒以肆勤識治庖之
效智樹風遠邑綰務要津政條以修局事無雍監司之
薦應法銓審之較中科入著秘局進丞獻寺竝居美秩
咸服茂恩

陸絳可著作佐郎張靖聶堯竝可大理寺丞制

敕某等邑大夫司百里之命郡督郵兼一州之綱二者
之任則均三人行各異以爾絳名有幹局得諸才旄

舉將爲多治縣有迹以爾靖通法家之學以爾堯本經
術之明吏資竝深官簿無缺終更赴集鈎攷應書參丞
理官用信吾賞有以自效勿替厥修

何世昌可著作佐郎陸若濟劉寅張齊古竝可大
理寺丞制

敕某等嘗升論秀之科亦階任子之法竝濟公路數調
銓臺臯臨榷木之酤胥及連教之掌或絃歌而字邑或
書檄而從軍咸能飭厲廉規敷宣敏力交章入薦計最

居高賞格具存陟恩宜沛佐修書者秘丘之美秩承治
獻者列寺之要官榮序有開班朝孔邇勉固後凋之節
以期遠至之塗

宋垂範可著作佐郎王堯臣杜松張知常竝可大
理寺丞王景華可衛尉寺丞制

敕某等大選之法六歲坐優舉乃得從有司鈎攷便坐
臨覆隨其功狀陟之京司故才弗及遺而器無滯用爾
等或廉茂進官或高華取資從政郡邑之間服勞事局

之次治有最目課應陟書覽薦牘則居多視素履則無缺秘丘領著列寺爲丞竝日美遷尚期來效

吳英可著作佐郎陳世卿可衛尉寺丞楊希古沈紳孫祖慶竝可大理寺丞制

敕某等或預揚庭之選或藉高門之資同入銓流分幹吏治參畫著敏撫字有勞善勾邑版之稽能盡地力之教外則大使之薦雜之最迹內則選部之覆審如計文終更若茲褒勸宜爾入領史官之佐往服廷尉之丞進

參衛屯胥列京局宜慎榮塗之漸勿令素履之渝念報
已知當虔吾訓

孫諮可著作佐郎王師旦王震朱彭竝可大理寺
丞夏侯維可衛尉寺丞制

敕國家著定攷法差進銓流壹責監司之官參稽保任
之法省審旣正遷陟乃宜以爾等或州舉升科或世資
補吏除軍從事爲郡決曹領算商車典臨茗局職修課
舉行敏節廉按察之薦條聞鈎校之司覆實書省有佐

卿屬置丞竝從臺格之遷益虔朝寵之茂無易而守更效其來

前石州方山縣令王佐可著作佐郎前泗州盱眙縣令吳天常睦州司法參軍前監温州在城商稅務傳變竝可大理寺丞制

敕某等久從掾令之職咸有幹廉之稱使者交章攸司覆實言爾最狀甫應遷科朕親御便廷訾相其質可以使因而敘遷進屬上臺之聯益思良吏之守

王度可太子中允牛知新可著作佐郎張頤可大理寺丞制

敕某等朕欲濟官政之宜究吏人之迹故責在保任而壹于監司爾等或奮藻賓興或治經進宦參被邦侯之選典司都獄之繁行已有方服官無缺薦論狎至鉤校率同差次資名褒進秩序惟承華之屬通文石之朝典著秘書持平列寺彙征以進胥慎而修勿蹈匪彝益思自效

郭評可太子中舍人李偉可大理寺丞制

敕某春坊允僚比東臺之封駁秋卿丞屬佐廷尉之讞
疑或顯用才流或參選吏幹以爾等修辭入第預軍從
事之招治禮得科歷郡決曹之任外章交薦滿課終更
質諸銓條灼有治狀宜寵承華之秩往司李法之書彌
勵來勤勿更前守

劉孝忠李允中竝可太子中舍人劉炎可殿中丞
制

敕某等早階科等之升或緣蔭格而仕積勤官簿升屬
法卿分守二邑之祇顓司一局之利條上最目協應陟
書宜進承華之僚入丞中盾之省益樹風迹以對寵靈

文恭集卷十二

欽定四庫全書

文恭集卷十三

宋 胡宿 撰

外制

葛宗古可內殿承制制

敕具官某緒惟將閤班在禁墀出護營兵西遮隴道奉
上惟謹率下有方自白年勤實中勞典稍進承于中制
尚畱過于外虞勤就朝榮益宣武幹

劉吉可內殿承制制

敕具官某少勵敏資服從煩使積諸勞最班于禁嚴屬
觀請老之章求援攷課之法不令遺力亦使寵歸進承
中制之聯往服稍遷之渥

劉仁用可內殿承制制

敕具官某嶺服之外窟穴黎庶皆在朕臨覆之下往時
小醜亦嘗跳梁山谷勤兵遠戍蓋不可廢爾居警邏之
任識拊循之方善遏士兵不擾蠻蜚封畧粗定監司來

言用旌外勞進承中制爾其務安遠俗取稱吾恩

王文思可內殿承制制

敕具官某迪知武經擢任軍事參典中涓之謁往制樓
煩之衝式過外虞亶無遺力嘉覽帥臣之薦進承制旨
之音秩峻殿墀寄深邊部勉思忠果取稱寵嘉

鄭可度可內殿承制制

敕具官某籍在廷臣名有力局數被乘輅之委靡辭馳
隰之勞參幹事經淹移年序因其齎伐推以陟恩用升

近陞之聯且視外朝之品益圖勤瘁用對寵靈

王知信可內殿承制制

敕某定爲勁兵之處扼北道之衝爾監軍屯歲上官伐
拊循控帶頗適厥宜強敏恪廉復寡尤悔通稽成課參
合陟文稍用次遷進承中制就虔朝渥尚勉武經

凌瑜可內殿承制制

敕某階食德之舊服禁塗之近繼銜使指綽有才資往
筦列城之酤來上宿官之伐歲序勤止迹狀信然敘進

內聯參承中制尚繫幹局之敏勿忘率履之勤

孫惟忠可內殿承制制

敕某籍著殿中班禁嚴之地任居寰內提警邏之兵驅馳累年肅清所部參舊勤而自列用攷法而當遷宜峻墀塗進承音制尚謹冠偷之視無失士兵之和

李琦可內殿承制制

敕某朕以春秋之法責于外家以漢氏之恩拜其諸子以爾居然秀挺資以粹溫服在禁塗之華尉彰戚畹之

令鄉疇前課稍進內聯方之常均猶以未稱宜入承于
恩制差用峻其資名往虔儀品之勞益效風訓之美

陳文壽可內殿承制制

敕某早以修謹預參內侍復以開敏典治劇事近以營
禁庭之別殿奉列聖之睟容主作有勞落成不日宜伸
旌陟以寵幹能超承中制之聯對視外朝之品茲爲異
渥尚勵勤成

李評可內殿承制制

敕某夫外戚之地多徇紛華而和文之庭雅尚名教以爾承祖德之茂習父教之忠不雜貴游克蹈訓行近緣貴主之請稍進禁塗之聯俾漸邇于威顏益遷承于音制往修勝業以對褒章

李永恭可內殿承制制

敕某天水彊藩西遮隴道羽林積弩分屯勁兵爾出監連營且隸帥府驛上勞最朝案計書戎政頗修軍法應賞宜自近班之峻入虔中制之承尚加撫循以對旌陟

夏偁可內殿承制制

敕某秦官謁者典賓贊之儀唐制攷功校宣納之最必
辭令之尤練與容範之交修乃可以進服邇聯通承中
旨以爾習知儀式綽有才資早參上閤之嚴久侍大廷
之秘善于音吐恪在詔傳有嘉累稔之勞兼賞寡尤之
履稍遷近職敘正美名尚最乃修勿懈于素

李繼明可內殿承制制

敕某蔚有世資敏于力局典司中謁領護外屯習辭令

而精明治符籙而肅給積勞累稔大比應條稍遷音制
之承尚倚軍和之董益思訓厲用稱褒優

王懷德可內殿承制制

敕某惟秦中之雄扼隴上之要號曰勁兵之處分領盛
秋之防爾提支兵介在遠壁仍關縣邑之治頗得羌戎
之和列上勤庸覆中攷格宜進承于音制尚就委于屯
防無忽稍遷有以自效

麥承信可內殿承制制

敕某河苗衍溢害中國者舊矣爾以力致之敏更材使
之煩繕完疆隄習知水行雖故道未復而別都訖寧留
司以聞勞勛當陟進承中制升視外朝勿廢前勤姑續
來效以對我褒遷之寵也

王仲平可內殿承制制

敕某爾以辭令之習典吾謁者之任以戎事之練護乃
外兵之屯亦用使材出將王命得專對之體有載馳之
勞還露封章前援比例夫賞國之典也舉不越功而忠

是圖吾賞何愛中制之選親承音旨有以自效無忽我
褒遷之典

劉永可殿中丞制

敕某以膚敏之材資潔慎之性束脩無缺莅任有方加
駕倅車關掌列郡協宣臺禮之厚導致海沂之康休有
勤庸稽合褒典進丞盾省之秘尚委屏星之嚴雖曰稍
遷勿忘欽率

方安石可殿中丞制

敕某國家以大比之法攷庶功之能計勞以遷于賞爲
懋以爾濟世德之美習吏資之敏領邑囊內著績官下
因歲成以報政按治狀而應書擢升內盾之華班尚寄
西畿之劇邑勉條終課取稱茂恩

盧詠可殿中丞朱仲元可大理寺丞制

敕某等進官以經術臨履有操尚或累預諸侯之選亶
無悔尤或再終百里之更具有功次積勤可尚攷法宜
遷超丞盾署之華進備理官之屬用旌勞最亦振滯淹

服我茂恩勉而來效

李從善可殿中丞趙沐可太子中舍人制

敕某等承籍世資參服官使比更郡邑之任咸聞節素之修官下政成臺中課集參稽弗謬擢敘是宜用丞盾省之聯兼備儲坊之寀益思慎履無忝褒恩

呂湜可殿中丞楊極高良佐竝可太子中舍人制
敕某等或進繇經明或仕以蔭入鄉從智效竝用法遷擢承京司典治刑讞外稽出納之令對宣宰字之條局

以幹聞政由勤著參稽成課進懋陟恩優以中盾之聯
預于儲禁之窠始陪朝拱尚服官箴

王希顏可殿中丞盛行甫可大理寺丞王詢竝可
太子中舍人制

敕某等或憑藉蔭格或究研律學參承京局外握縣條
服在廉平訖無玷缺最凡所上鈎校弗疑進升盾省之
華擢預儲僚之選竝班朝著仍寄邑同勉思聿修有以
自效

張述任伯傳竝可殿中丞蘇盛項里周竝可太子

中舍人制

敕某等或早中臨軒之選或嘗藉舊門之資次補吏員
進承京屬更試力局則牢盆之利甚饒分宰縣同則鳴
絃之政居最參稽來伐協應陟書對遷盾省之華竝寵
儲僚之秩益思自效無廢聿修

周偕臧論道杜濟竝可殿中丞陸暮可著作佐郎
制

敕某等以才辭之華升預俊級以力局之敏進列京司
臨長遠服之民賦宣劇邑之譜剽治無壅控帶有勞吏
民便焉歲月勞止因稽齋伐之實竝從進秩之科丞盾
省者洵且華佐史觀者蔚然美咸自修飭勿忝褒嘉

晏詹可殿中丞王登王康王允竝可太子中舍人

王獻臣可大理寺丞制

敕某等或出曲旃之家而才質自美或佩滿羸之訓而
術學素優入踐王官之華參從吏職之試剖盤根而輒

解甘藿食以自清驛上計文臺中攷法稍遷中尚之局
進預東禁之僚竝通朝閨亦丞卿讞咸在修飭勿忝褒
升

魚周物王隣臣竝可殿中丞周端李格竝可太子
中舍人崔宗旦可大理寺丞制

敕某等官令著最臺賞有格汎取三期之效博勸庶工
之進爾等或得諸髦彥或奮自經術鄉繇任吏之法擢
以讞丞之名簽盛府之元僚掌象雷之大邑咸著善狀

悉上計書鉤攷信然褒進爲允殿局之尚參掌名物宮僚之貳通受令旨乃自法卿之屬竝爲官制之華往服茂恩益圖來績

江中行可秘書丞制

敕某惟士之髦奮入英毅用吏之敏擢佐史筵受委別京之曹領行列掾之職局無逋事歲有成勞攸司以言著格應賞通外朝之初籍丞本省之清官尚勉爾休往虔吾渥

李恂可秘書丞制

敕某朕選敦樸有道之士授經藩房掌教宗子資承風
訓之益嘉聞歲序之勤宜推陟恩且勸循誘以爾策造
秀之第服清恪之操淹通經蘊究治政宜臯圖踐履之
勞擢居著撰之局置在諸郎敷訓羣言誨接有方褒遷
宜及丞于本省號曰清官勉服朝闈之榮益虔宗屏之
訓

華參可秘書丞制

敕某朕用偉人鎮于右屬復諭髦彥之辟以參籌畫之功若時居府有課集臺惟是元僚之賢宜懋攷功之賞以爾馳吳士之望懷東序之資雅有學尚蔚負文采數被諸侯之選亦勾中司之稽久隨輩而栖遲能從事而黽勉質成有典覆視應條承第一流之官任中秘書之職亦緣文翰之故且旌書檄之才勿薄外遊更佇來最

張芻可秘書丞制

敕某朝家官人之制用朞以書代沿閏以質成著爲成

科抑存至勸以爾學爲諸已行高于時俊拔有文方雅
成範烝自髦士置之經庠參備儒林之官以傳先王之
業豈止建善首崇治本亦將厚經行之育收器識之用
會誦說之最中攷課之法卽其本省丞以清官有著在
庭往踐乃位

程昌言可秘書丞制

敕某夫勸至則官修賞行則吏奮閏成而陟用此物也
以爾烝自髦士號稱敏才參于賓薦丞我赤邑幹固畢

濟安和弗流擢佐秘丘之員外集熬波之利邑無逋事
局有美資州上積勤朝舉遷法自修書之美職進本省
之清官有著在庭勿懈于位

張維可秘書丞制

敕某賓興奮藻膚敏牽絲服士規而尤修賦縣條而畢
振治成遠服課進有司稽功令以當遷念弦歌之維慎
用擢丞于本省仍臨長于舊封有著在廷勿懈于邑

丁翼可秘書丞制

敕某秘省官清丞爲第一非有才令不以相處今簡拔
差異而資望益華以爾用文詞之優兼材質之美出于
望胄奮從賓興訪之行能則束修無缺稽之官簿則勞
最有條覆實攸司遷丞本省尚續名家之韻勿替王官
之箴

李規何若谷竝可秘書丞制

敕某等夫攷績用人之法驗于已試則效以實著而官
乃職修甄賞之科時則不謬爾等以學力之敏前致俊

科政績之優入佐書局外更吏治復上歲成審覆信然
褒勸宜爾進班文石對丞秘丘就服清聯益懷素履

范中模張執中江楫竝可秘書丞制

敕某等夫治迹連最而朝賞不至則盡力之吏將何勸
焉爾等階進造之選有彊濟之材鄉程薦任之優參升
刊約之局外臨州服對領縣章計上勤庸稽合勞典即
其本省丞以清官秩則就遷恩惟下究以明急遐外之
賞篤勤能之勸也尚進懋爾力勿鄙夷吾民咸慎歲規

取稱褒渥

陳藻可秘書丞梁谷可左贊善大夫制

敕某等夏口帶江民俗喜訟天水被塞風謠尚武莅其
屬邑尤資健令適有成治爰賦茂恩以爾或進自承髦
或仕以承學竝華史局之選咸佩縣同之章齎伐自陳
按書當陟丞清聯于本省躋榮序于東朝竝撫寵甄益
勵端操

竇彤王穆竝可秘書丞俞希及可太常寺太祝制

敕某等或以才令之選策于時髦或以諷訓之修育自
門子參試以事往服厥官列郡之政修有司之職舉歲
勞均著朝賞懋推宜承本省之清往虔祝筴之告勉而
端節服我褒恩

邢夢臣可秘書丞韓公彥徐總竝可光祿寺丞杜
子才可太常寺太祝制

敕某等朕分建庶工參濟羣務謹旌陟之法示開勸之
方計勞以升限年爲得以爾等或拔自俊茂或蔭諸高

華率用才資雜治邑局所至職辦乃今官成稽參應書
差次更秩進承中秘預屬內卿逮于祝史之聯胥服王
官之次咸思自效勿廢聿修

周大象可秘書丞任利有可殿中丞陳之損可右
贊善大夫制

敕國家制法以檢官成計年而攷吏治勞能者進否劣
知勸具官某等或策名以文或籍資而仕竝承風訓之
益咸聞節行之修居邑者簡惠而不苛領局者強敏而

能力以勞自白在法宜遷進承秘丘入預盾省逮升僚于東禁竝著籍于外朝往哉欽承務乃修綜


龔鼎臣可秘書丞張瑤王鎡竝可大理評事陳知常可右贊善大夫制

敕某等國家因堯典之舊采周官之法率用一閏參比百工著爲成規汎存大勸爾等早階文藝之選或資胄緒之華服在縣章恪居利局書伐來上舉最當遷擢承秘丘進陟儲寮胥及列卿之屬對司理法之平往荷茂

恩益圖敏政

敕賜進士及第王九成可試秘校郎制

敕某鄉升俊科方在穉齒閱于補吏之格退有待年之期勝冠已登攸司言狀姑試發硯之刃往栖勾簿之員
慎履在初祇命無怠



文恭集卷十三

欽定四庫全書

集部

文恭集卷十四至
十六

詳校官侍講臣王燕緒

檢討臣何思鈞覆勘

總校官原任中允臣王燕緒

校對官編修臣于鼎

謄錄監生臣牟焜

欽定四庫全書

文恭集卷十四

宋 胡宿 撰

外制

王珪可太常丞制

敕具官某策府入遊所以養器用之識計局參領所以
試才敏之能績效既聞朝賞宜懋以爾出文儒之舊用
才辭之優奮取甲科服在書殿粹和以應于物沈默不

流其心紬繹典文多證正之益牢籠征算著鉤校之勤
財府無腹民之譏天官按攷課之法應書當陟用例稍
遷丞諸樂卿贊我邦禮姑率舊職無廢前勞尚當勉之
識其遠者

陳湜可太常丞制

敕某選從茂士初有美名進服朝聯分倅州治自罹廷
尉之法解去奉常之官屬吾名臣越在憂服以葭莩之
聯戚從草土而控誠且云暗昧之愆兼陳隕穫之狀爲

乞養親之祿重違舊德之言特出常均俾還故秩當念
推恩之異勉思復缺之難

王异可太常丞制

敕某早躋俊等寢服朝聯長治劇邑之煩介居左蜀之
險節廉既著政敏亦修條上計文覆視官簿勞最甚白
褒陟信宜擢丞禮樂之司尚委弦歌之宰益思自效勉
績來勤

董某可光祿寺丞制

敕某拾青以經製錦于邑嘗學弊獄能傳爰書因干試
于有司俾決平于讞法處文無害麗辭有條廷尉以聞
膳丞為陟抑存前比勿替平反

王泌可光祿寺丞制

敕某登造秀之目補察訪之員莅吾寰畿介在西北密
邇萑苻之黨竊弄潢池之兵能擒諸偷以清闔境都府
言狀有司覆實宜寵京司之陟入丞屯衛之聯益圖來
勤用濟前美

陳安石可光祿寺丞制

敕某朕稽合年最褒叙吏勤勞弗外遺恩亦下究以爾
策俊造之目班宰字之條撫介山之舊封因陶唐之厚
俗鳴弦所化蹊田自默治有能迹驛上計文擢預內卿
之丞尚仍大邑之舊益思自效彌勉來勤

李擇可衛尉寺丞制

敕某仕以經藝敏有材資往字一同之氓善詰四封之
盜施以方略得其主名就巢穴以悉擒致疆亭之增肅

覽嘉勤績伸用賞條俾丞宿衛之司具寵追胥之效服
茲旌陟益在慎修

馮安之可衛尉寺丞制

敕某臯從勾簿委以算車校歲課而甚羸應賞條而當
陟計司言狀衛府進丞尚敦廉飭之規取稱褒遷之命
會班可衛尉寺丞制

敕某朕惟人材之難必儲備于無事而待用于歲時使
所用出于所養然則才者豈其所自為哉嘉汝好學文

而能靜匠事之屬以試汝能益勵素守朕將觀焉

李式可衛尉寺丞制

敕某習廷尉之律優而入官典京府之獄敏于為吏局
無留事人用不寬尹以狀聞秩且歲滿臺有賞格府援
舊規遷任法卿之丞尚寄決曹之劇益思營職勿廢前
勞

劉景可衛尉寺丞制

敕某藉名門之資有幹局之用中銓調集經勾簿書外

臺薦延倚辦征算頗聞精力之敏且嘉課最之饒主計
條聞大選覆上宜申朝賞之信俾丞門尉之嚴往服漸
階勿隳前操

陳仲通燕仲舉竝可衛尉寺丞制

敕某等竝膺門第之育參列廷尉之平簞簞交修弦歌
出宰奉法自守舉最當遷有司以聞褒典惟舊宜即本
寺進丞列卿尚敦撫字之力益圖愛利之政

王詔可衛尉寺丞商令聞可大理寺丞制

敕某等學優而仕服官勤勞或登仕于賓筵或近綏于
邑政而幹蠱咸力廉飭有聞章薦嗣升銓格斯應擢丞
衛府參議理官率示寵遷懋于祇恪

周宗閔可衛尉寺丞王正臣可光祿寺丞寇誦可
大理寺丞制

敕某等憑世胄之資承風訓之益中參京局外服官聯
政以敏聞課亦羨著黻勞自白最狀頗明光祿號內卿
衛尉掌門禁大理平疑法諸丞皆屬官就服茂恩無廢

甘節

毛維藩可大理寺丞制

敕某早階科選兼敏吏資擢從尉察之司舉臨筦權之局置無遺力沛有美緡迨滿歲而終更及有司之鈎覆審如功令宜信賞條擢任法卿之丞參司刑讞之典往祇朝渥彌服官箴

趙謹可大理寺丞制

敕某學通法家仕至郡掾曹事能舉履道益修監司之

官保任獻狀終更之課鉤校應書擢居讞丞往傳平典
益思潔慎庸對褒嘉

蘇有可大理寺丞制

敕某治經預選習吏有勞掾于都輦之煩通乃刑名之
學博文無害援比當遷閱府奏之條陳擢理官之丞屬
尚委例成之寄益留明慎之思

鄭宗勵可大理寺丞制

敕某朕用天聖詔書拔舉令宰爾自尉察之任被監司

之薦歷典二邑訖無逋事大率可紀小如致疑選部以
聞便廷以對合舉將前後之數除法卿丞屬之員勿替
官箴徃度朕命

李士昌可大理寺丞制

敕某朕慎銅墨之寄惜才錦之傷特用詔書選拔令宰
爾以資名應吾舉力局幹厥官治不煩苛居有愛利因
加褒寵勿替厥心

王尹可大理寺丞制

敕某習通城旦之書資入州網之目外釐煩局實賞牢
盆力營近監之饒歲溢熬波之數終更結課遷陟應條
用除棘路之丞往治竹刑之讞足伸家學益慎官箴

張太初可大理寺丞制

敕某辭中俊科才號能吏早隨選補之牒嘗署尉察之
員近在東畿居當孔道剽輕聚類椎埋作姦主名起居
莫不究悉根株窟穴盡得剪擒京府以言臺格應賞特
丞刑讞之屬且旌方略之明勉服漸階益圖敏用

卷十四
丁諷可大理寺丞制

敕某爾以庸敏之資被教忠之善卿從卿屬入寘書筵
能服校讎之勞亟聞精審之最來援攷法參叙宿勤俾
丞治讞之司尚仍刊籍之舊益崇門業徃服朝榮

史宏可大理寺丞制

敕某緒承簪紳敏有局致卿升衛府列在京司具繫游
刃之能俾幹摘山之利宣勤匪懈底績有成通驛奏以
自陳按臺規而當陟遷丞讞寺進屬法卿就服朝恩勿

遺公力

謝景祕可大理寺丞制

敕某夫舉最當遷增秩留治西京良宰之故事也以爾
烏衣舊族名臣之子志行修潔才章典蔚登科在甲治
邑於東風政修明績伐來上參用有司之覆稍進理官
之丞尚懋來勤圖濟光美

劉讎可大理寺丞制

敕某以學力之精階于進宦以吏資之習服在賓從亦

用已知薦臨利局往幹牢盆之入頗增近鹽之饒滿課
代還攸司覈實擢預法卿之屬往操刑讞之平惟服漸
階勿更初節

趙丙可大理寺丞制

敕某承列掾之乏居被遷之衝隨遠檄以忘勤奉吏畫
而無缺多有舉將參質攸司悉中保任之科宜膺擢敘
之典丞于列寺佐乃法卿往服褒遷之恩勿渝正素之
節

李孝孫可大理寺丞制

敕某早繇俊等參列京司倅邊壘之支軍控林胡之絕
塞馳郡郵而上計覆官簿以應書稍進讞丞通為法屬
益懋終更之課勉思臨履之方

雷簡夫可大理寺丞制

敕某出於名閥資有敏材領護渠防習知水事通谷口
之派溉關內之田省彊堤捍固之煩獲泉源灌浸之利
使者言狀有司質成勞實可嘉秩久未進特賞理官之

屬尚繫行水之勤用振滯淹亦旌強濟

魏耆可大理寺丞制

敕某宰字嶠南發摘境內敏有方略勇于追胥多錄赭裾之姦大絕鳴枹之警亶無遺力休有厥勞本郡以為言攸司曰當賞丞諸列寺佐我法卿尚勉來勤徃祇顯拔

楚泰可大理寺丞依舊直講制

敕某朕選通經義誦說有法者勸教胄子爾本學力自

致俊等卿因祭酒之薦置在詳講之員通叙外勞亦已久次雖中坐細故而見稱大臣叅閱薦章足驗素行姑寵法卿之屬仍敷學省之經尚圖後行毋倦忠訓

楊南仲可大理寺丞知國子監書學兼篆石經制敕某狀以首善在學至教本經將遠塞于異端宜圖刻于方礎敷求毫法緒正典文爾卿被薦延入預刊正見稱篆籀之學頗整字書之訛亦既肆勤宜有開勸進丞大理之屬闕知小學之司勿替爾勞徃虔茲渥

張初平可大理寺丞充堂後官制

敕某法學本精吏資兼敏曷委銅章之任尤著壺飧之清屬宰士之缺員繇銓流而應選按文參試事條多通擢為廷尉之丞寘于相府之掾勉思勤篤徃服寵榮

馬中民可大理寺丞充堂後官制

敕某法學稔通廉規尤飭早從銓集嘗預賓籌會旅士之缺員試案文而習職擢升卿寺祇局常塗徃服茂恩
益思慎履

盧待舉郭宏竝可大理寺丞制

敕某等治后蒼之禮習蘇公之律進服官政更試吏資
或以郡督郵之名典幹局事或用邑大夫之舉班錄縣
條上治目而應書稽賞文而中法對升刑屬胥列京司
往服茲榮勿更而守

張閭王熙竝可大理寺丞制

敕某等朝家以鹽茗二策籠山海之用置賞格以差殿
最舉能吏以謹出納爾等竝以辭科之選兼吏幹之敏

更試大幕薦領煩局終更來上羨饒居多有司以聞應
書當陟竝丞卿讞胥列京司徃慎爾修以服茲寵

尹立李惟永竝可大理寺丞制

敕某等或治法家之書或階門胄之蔭能謹風訓善畏
簡書以至任紀綱于州曹賦弦歌于縣寺職皆修舉政
不煩苛監司章言銓審條白胥應攷功之歲竝遷治讞
之丞當虔吾恩彌慎爾徃

費子卿李孚佑竝可大理寺丞制

敕某等朕計大選之最拔羣吏之能才既畢甄吏則胥
勸以爾等或修辭中俊級或治經有師法解經賦祿沿
牒服官竝在諸侯之筵對書從事之檄薦延累牘遷陟
應條擢居列寺之聯悉脩法卿之屬益懷謹畏徃服褒
嘉

東莊王荀龍竝可大理丞制

敕某等本用經通悉中科等逮奉官使稔聞節廉資名
且深慰薦亦衆因終更而赴集稽選舉而應書領出納

于要藩善經營于劇事自陳勞最參覆計文課吏之法
當遷理官之屬為重近于通籍服在攸箴

陳禹臣李輔竝可大理寺丞制

敕某等或精法家之學或藉門胄之資入補吏員胥奉
銓集尉于北部著發姦摘伏之能宰我囊封有撫弱字
孤之惠公車交薦京府條聞居多名臣是其舉將足觀
率履宜沛陟恩丞于法卿平乃疑讞尚服榮塗之漸勿
忘素節之修

姚品楊文仲竝可大理寺丞制

敕某等周制計治而賞漢法舉最以遷所以勗官成而
勸吏力也以爾品治容臺之禮中選明經以爾文仲出
奕野之甥得任官次施字人之縣譜典彝命之軍書力
致稔聞章薦交集稽合銓程之格擢居刑讞之丞咸勉
爾修以對吾寵

閻諤劉偃竝可大理寺丞制

敕某等國家務勸治功思究吏迹取信于保任之法視

成于銓審之司申陟乃勞叙進其秩爾等本階蔭格亦起法科交蓄敏資叅承幕職逮終更而齋伐咸被薦而應書與對便廷聯丞列寺往祇茂渥勿替清修

陳仲舒周昺竝可大理寺丞制

敕某等行已則修習吏而敏鄉典別京之獄亦班劇縣之條訊刺得情撫綏有惠閱需章之交薦賢攷格以竝優宜丞詳讞之司更委平反之任益圖來裕彌勗攸箴
劉汝言楊自周竝可大理寺丞制

敕某等朕聞設張薦格擢叙吏勤勞弗外遺恩亦下究以爾等久從選部之集叅承幕府之籌介特無瑕幹固有力交章保任結課終更質諸有司審若衆奏擢預法卿之屬徃服王官之箴益慎爾修勿忘茲寵

徐高丁為寶韓昌竝可大理寺丞制

敕某等或治博士之經或通法家之學早階科選久服仕塗絜矩自將履官無缺騰言按察之吏竝陳保任之章叅服中銓胥應陟典宜進列卿之屬徃居治讞之聯

祇服茂恩益圖敏政

吳彥先劉易簡張庾竝可大理寺丞制

敕某等或進繇俊等關掌印閣或任經宰理歷試按文
或積有資名濟以風力叅軍從事之畫居邑大夫之員
悉奉更書來集大選閱交章之慰薦視齋伐之著明咸
契陟科叅丞法屬階榮塗而伊始堅素操而勿渝

孫傑可大理寺丞馬中庸可衛尉寺丞制

敕某等或以經拾青或緣蔭隨牒臨長邑室叅列版曹

字氓有聞領局且幹監司薦其善狀終更集于選部鉤校弗謬旌陟乃宜理官置丞衛府有屬竝寵京司之列勿忘士矩之修

孫薰可大理寺丞單鼎可太常寺太祝制

敕某等奮繇蔭格服在京聯臨宰右蜀之民典幹別都之帑越從官次列上年勤適敦泛勸之方爰用稍遷之法猷丞進秩祝史陞名尚服箴言交修節素

杜諮可大理寺丞張文告可著作佐郎制

敕某等或積資至幕或被舉治縣叅畫有補撫字弗苛
監司薦聞銓覆應狀祕丘領著讞寺為丞尚勉來課之
修以對陟恩之茂

綦愿劉濟竝可大理寺丞韓標可著作佐郎制

敕某等或力文升科或治經署第習知為吏之敏舉遵
行已之方幕有婉籌邑無逋事薦書交于公府滿課集
于銓臺擢佐修書之筵進丞治讞之署益思勉勵用對
褒遷

朱達楊若冲竝可大理寺丞張安國可衛尉寺丞
制

敕某等夫薦任之開所以拔能吏攷法之舉所以勸庶
工以爾等或治曲臺之經或藉舊聞之蔭預籌幕府獲
佩縣章亦叅法律之曹竝宣郡邑之力交章以薦終課
而還賢諸有司應乃褒典用為刑讞之屬寵以宿衛之
丞胥曰異恩彌飭廉矩

全余白祖或李秉竝可大理寺丞周復張熙竝可

著作佐郎制

敕某等朕欲選清能拔寒素故保任之法專施監司而課覈之方一歸銓審叅覆不謬褒陟乃行以爾或奮由才章或進以經藝預籌大幕領治一同亦從尉察之司徃釐筦權之局竝委束修之士宜敷渥茂之恩領著史筵進丞法屬悉近朝闈之陟益宣公路之勤

李真卿可太常博士制

敕某夫賞以叙官治勸吏力有若名秩之美而得才彥

之良乃允至公不為妄施以爾少厲風迹叅服文雅班
我外著丞于祕丘出算商車入奏計簿校府緡而增益
質臺格以應遷宜擢乃官且申吾信矧惟相絕之地差
近握蘭之資尚當勉之務識遠者

章峴可太常博士制

敕博士典相儀禮贊導秉輿今雖置員溢于舊制猶曰
美秩屬之清流以爾某聯卯國之華有閩士之望世用
儒雅顯政以風迹聞會奉更書還奏成伐叅質不謬序

遷有典資淹中之學講野外之絕徃祇褒寵勿替厥修

李復奎可太常博士制

敕某朕以監牧之繁沿使職之建將協濟于厥務亦叅
簡于乃僚屬當滿課之成宜叙懋官之陟以爾奮由名
闕綽負敏才更倅州藩頗厲風迹逮預王閑之掌時聞
馬政之修校齋伐而弗誣進容臺而惟允勿懈于素尚
勉乃求

李師中李建中竝可太常博士制

敕某等太常典禮樂博士通古今必得美材以相儀範
雖員品至隘而資望益清儒者所居朝選為貴以爾師
中性無外飾器有遠用以爾建中學力強敏吏資肅給
竝策俊髦之第咸稱風矩之修或典校禁中之書按行
寰內之邑或董司漕引之舸兼握宰字之條叅叙成功
交中攷法率從盾省聯陟容臺尚當勉之以對我稍遷
之典

丁宗臣可太常博士丁寶臣可太常丞制

敕某等國家試功之典叅任以職攷課之法質成于閨
用甄美效亦存至勸以爾宗臣吏資強敏器質莊重以
爾寶臣文典而蔚才敏且精是惟天倫竝入吾彀所試
有迹厥修弗愆或鳴弦以字人或剖符而守境竝時上
計據法得遷入丞樂卿進掌儀範悉號朝闈之美足為
家閥之榮就服寵褒益思勉勵

張師中可太常博士游奎可祕書丞陳知德可大
理評事制

敕朕用閏成之比計吏治之修雖官有大小之差而法
無內外之異所以均朝賞臺臺制也以爾師中材質粹
美風業修舉以爾奎南土之秀以爾知德舊門之良稔
服朝聯升預京局中幹事職外握縣條來上勤庸參應
褒典西京重于博士江左美于王官至于詳讞之聯竝
為進陟之美欽祗無忽褒勸在茲

郭祐侯瑾竝可太常博士陳儼可國子博士侯訢
可殿中丞制

敕某等夫一閏之法天氣小備施于人事故可以較官
成懋臺賞以爾等拱治朝之次有著在廷宣外服之勞
弗懈于位竭一官之智效上三最而歲優胥中陟科差
進榮秩寵以博通之士丞諸盾尚之聯就服褒華益思
清約

張絳可太常博士商體仁可殿中丞臧師顏黃仲
英竝可國子博士制

敕某等昔堯以職而試臣漢用法而課吏咸責實以觀

效亦累優而取陟以爾等士矩尤飭吏文滋習謹政修
之賦則嚴而不苛事裁局之繁則敏而能力績成所治
章下有司較閎闊而信然稽功能而審若差進容臺之
秩叅服上庠之聯乃及盾尚之丞并通表著之籍往踐
厥職彌懋爾勤

單煦可太常博士焦盛王傳張允竝可國子博士
馬直方王延慶明穆歐陽炳張仲宣竝可太子中
舍人制

敕某等或修辭干祿或治經服官亦籍舊門之資早承
食德之美擢升門序列置京司叅服吏勞協宣公力條
陳滿課鉤校陟書置有積勤訖無逋事稍遷禮閣叙進
經庠乃暨奉儲之僚竝預班朝之籍咸思砥節用副遷
恩

寘母沆可太常博士閭丘孝終張士明江正倫竝

可太子中舍人制

案寘母複姓不經見寘字似誤據制詞以盾局對容臺又似閭

丘孝終下
有脫文

敕某等或拔自王國之髦或通乃師門之學亦緣蔭格
叅服庶規臨政有聞處躬無缺竝上閏成之法咸稱吏
治之良覆案信然褒陞允若容臺相儀典之重盾局掌
名物之煩東禁奉儲外廷有位尚屬首公之敏用度進
秩之榮

武康可太常博士裴耕馬先張應符申屠會竝可
殿中丞史珍薛端竝可守太子中舍人李巽可大
理評事制

敕某等朕日者右饗合宮咸澤庶位竝甄一等之秩用
洽三神之和爾等類偕典恩差進茂級而滿課已上攷
格當遷吏勞不可以外遺王澤當令于下究竝申後寵
匪隔前恩往承朝綍之華勿替王官之守

潘夙可國子博士制

敕某蚤班朝次曷守嶠南蔚有敏才條郡邑之治沛然
精力籠山澤之宜銅冶以興泉府攸賴會奉終更之計
有嘉實至之勞擢任儒林之官叅司胄子之教益圖志

用往服品儀

武宗元可國子博士制

敕某爾藉外嫻之資預中朝之籍假以別乘倅于方州
自掛刑章黜臨利局因今課之云集援攷法以自言進
之成均任以博士宜思既往之課當服非常之恩尚勵
來勤庶幾補過

許恢李田尹偕竝可國子博士制

敕某等夫賞者國之砥石而官之利器先王所以嘉善磨

鈍績用是生法曰攷功謂此物也以爾等清修著聞強
濟有力或舊德是食或治經甚究叅施吏敏胥服朝聯
竝修官下之勤交中閏成之典進遷學省充預教官在
儀品以至高尚箴規之相勉

何夢昇可國子博士李勾可殿中丞制

敕某等進以經術守在廉隅敏有吏資善索民隱叅領
軍和之壘分秉州倅之車悉上最文交中褒典用進經
庠之秩亦遷盾省之丞有嘉治優無忘節素

牛拱辰可國子博士吳穆周諧陳舍竝可太子中舍人制

敕某等竝達于從政恪在首公馴致法丞叅服盾署或以弦歌之最著厥縣同或以征算之饒淹于局次有司獻狀主計為言年庸有成臺格應賞經庠峻于儀品儲案籍于班聯竝為茂恩益樹勤績

李元方可國子博士范袞郝大同竝可守殿中丞呂惟和崔象明竝可殿中丞黃延慶可右贊善大

夫制

敕某等籍通王官名任宰士于規隨而尤曉亦幹固之
兼資允屬三宮之文追復九房之祀推行制度省閔繁
文亦繫敏用之明不與先庚之素勤庸屢試泛等宜優
入典經庠進丞盾省逮儲坊之僚屬皆朝序之聯華徃
服褒遷益思恭慎

劉淵可試國子四門助教制

敕某執方技之學游貴要之門且有薦言乞從補授宜

試員于庠序俾脫迹于閭閻匪預銓流尚祇朝渥

樂永可試國子四門助教制

敕某挾醫砭之術精齊和之宜事吾大臣越在行府章
言謹幹之狀參敘勤久之勞就除學員尚執方技且從
舊德之請勿廢鄉時之勤

劉可久可試國子四門助教制

敕某早挾方書嘗游戚畹在舊勤而可紀屬遺札之為
言用優經省之名匪預銓流之集往虔次補益在勤修

曹博文可特授太常寺太祝制

敕某姻連椒塗族漸河潤早試理官之屬尚拘選籍之名誕節推恩後宮著令且有祈恩之請特從升秩之遷遂列京司往祇祝史

孫琪可太常寺太祝制

敕某早沿蔭格嘗補匠員遄遭親喪謝去官次尋外除從吉之始在季秋宗祀之前來援慶條且有比例宜遷榮于祝史尚助志于政經

姚預可太常寺太祝制

案太祝下當有脫文制詞內有某等爾等字樣非一

人可知又有對升儲案語非太祝可知

敕某等惟庶工之陟用三朞之成弗遺外勞略存大勸爾等竝通習吏治底慎官箴宣風力而有聞飾士矩而無缺縣條修舉局課衍盈灼有計文合于賞格對升儲案之秩差進祝史之聯參服褒嘉交思勉勵

聶平仲可太常寺太祝制

敕某詞臣之後年妙志美食于舊德綽有敏資鄉用正

朋之名出從外局之試安和備于諸事出納謹于有司
齎伐應書賞勞申信稍遷祝史之秩且旌門子之良勿
頽家聲當志于學

魏纁可太常寺太祝制

敕某早資蔭格遄正匠員掌庾大江之潯奏課高閣之
下質官成而既效攷歲比以當遷用升祝史之名稍進
京司之秩勉思謹節用對陟恩

裴士傑可太常寺太祝制

敕某勾匠屬之稽當庾氏之掌能精出納之各頗聞臨
履之修臺敘三期之勤朝獎一官之效稍遷祝筵往服
明綸

陳京可太常寺太祝制

敕某佐選外之邑在勾稽之員奉檄外臺採山北境歲
有羨數材以敏聞質之有司應于著格在勤可紀雖遠
弗遺擢預京司徃尸祝策尚承舊貫勉續前勞

吳瑛方蒞竝可太常寺太祝制

敕某等承舊門之資預大臣之薦參試事任善持箴規
不蹈悔尤且正閥閱已實有司之覆宜從祝史之遷泛
錄小勤勉圖永譽

張慶隨可中書主事孟可道可中書守闕主事盧
克用可中書錄事制

敕某等敏有吏資服在公府練事經而克暢親几案以
為勤行檢竝修功次可紀或稍遷于右局或少待于缺
員竝為進陟之恩益務恪恭之守

陳叔度可大理評事制

敕某天水杞羌胡之衝据汧隴之勝盛秋在戌重兵留
屯爾鄉承賓籌參委邇糴能宣力政以集糧道穀既有
備羌不敢動計臺舉最帥府言狀參覆不謬褒進是宜
升屬列卿平亭疑法平亭原本訛作平停今
據漢書張湯傳改正往祇恩陟
勿廢節修

程旬可大理評事制

敕某家世在南擅吳士之望考服能政稱漢吏之循爾

階緣任子之科馴致列卿之屬邇因薄罪之坐適領遠方之征課習有司法得遷秩用進承于棘路往治讞于竹刑無忘聿修有以自效

張諷可大理評事制

敕某臺屬有薄勾檢稽失近制選任委之丞長爾以材被薦計書代期中司列言居職無缺賞有前比法當得遷姑擢廷尉之平尚仍憲府之舊往圖滿課勿廢前勞

張希甫可大理評事制

敕某廷尉天下之平丞屬所選枉直攸寄爾以華腴之
蔭試儲校之員雖不積吏勤而稍涉年序加有外戚之
請宜佐法卿之評驟列京司益慎朝檢

馬琮可大理評事制

敕某籍門曹之資預京司之列尸于祝策領我祠官試
諸事局之煩聞其吏力之幹年庸當陟刑讞是評不遺
爾勤往服吾渥

俞祐甫可換大理評事制

敕某早籍掖塗之資遂階使級之選頗聞幹局稍最輶
車求換職于京師俾評刑于卿局尚敦素履無忝清修
馬圯扈高王誦竝可大理評事制

敕某等承世閥之美號門子之良參列京司分條事職
以年勞而自上稽臺格以當遷用擢佐于理官俾評廷
于疑法無替爾職尚謹攸箴

任承德可試大理評事制

敕某邇因薦任之牘擢為宰字之官邑在甬東地連越

絕政惠且敏節廉而修代還中銓條上初課臺省明格
軍有從事幸無草檄之急尚寄鳴絃之舊往圖後效來
究前恩

路諫可試大理評事制

敕某爾前以調補尉員督縣之盜賊今以資中都吏任
郡之紀綱鄉擒寇偷竇著閥閱所部上勞攷有司舉賞
格功疑惟重賞以申信擢參幕裏之畫脫去府中之趨
茲為異恩尚圖來效

馬知良可司天監丞制

敕某傳疇人之業參保章之屬祇勤無懈占候有勞俾攷績于攸司命遷丞于本局尚隸陵宮之職往欽臺檢之恩

丁濤可司天冬官正制

敕某傳疇人之業任冬卿之丞思湛密而寡尤術推步而多驗有司較最在法得遷宜升和叔之聯且寵石申之學

周琮李用晦竝可司天中官正于淵舒易簡竝可
司天監丞王士隆可守少府監主簿充翰林待詔
制

敕某言天之學古有三家粵若渾儀昭合乾體朕緬懷
往範恐失舊傳因命究研且令制作適觀成績第用賞
勞爾等通甘石之經深梓慎之術能奉吾詔咸竭乃精
克正規模弗愆晷度差進清臺之秩并預禁林之聯往
服朝恩無替爾職

祁咸亨可少府監主簿制

敕某習知方技祇服禁庭臯經祀之恩猶滯勾稽之秩慶條具在匠簿是升勉思官守之勤姑對朝恩之茂

王德悅可將作監主簿制

敕某以勾稽之名承庀官之乏守在尉察善于追胥多獲椎埋之姦有嘉強幹之力疆亭息警州部列言較臺格而當選用匠員而申信往虔吾渥勿廢爾修

張潮可將作監丞崔公孺可大理評事制

敕某等在寰輔之地振津陸之要惟是支局分隸屬邑
爾以質幹之敏上等課之成征有羨緡酤多餘息放于
末利在道則非恪于首公其勤可錄進升匠屬擢任刑
評往祇甄叙之恩勿忘修飭之素

文恭集卷十四

欽定四庫全書

文恭集卷十五

宋 胡宿 撰

外制

葛源可司封員外郎制

敕國家沿挾銅之令以收七福因採山之法用廣五銖
參選幹能分涖經畫屬叙稍遷之典宜推加異之恩具
官某材堪治煩政有能迹嘗更守于列郡適分委于軫

車按南州寶治之饒佐縣官園府之用宣勞于外興利在公章叙前勤聯及今績宜寵左曹之秩用優主爵之名就虔吾恩益營乃職

田京可度支員外郎元積中楊佐並可屯田員外郎胡世卿可國子博士制

敕具官某等夫勞之弗圖治道或弛賞以合勸政體乃修歷代攷課之規所以聳善而旌伐也以爾等敏有才具蔚為時髦或文雅自將飭士範而無缺或法律可任

條吏事而有餘參服治朝之聯分持衆職之劇有資優而望舊或課最而職修胥應陟書差進清秩稍遷支度初拜壘屯竝為郎選之華且旌文士之美尚圖來績庸對茂恩

盧成可度支員外郎吳秘可屯田員外郎張珪可
虞部員外郎陳象之可比部員外郎制

敕具官某等朕沿三歲之比稽庶位之勞表顯治功差升茂秩泛存至勸抑惟舊章爾等體行莊修力局開敏

參穆王官之序分條吏職之煩或擁傳巡行按章覆讞
糾虔中法平處弗寬或守境寬平監州敏肅竝援功次
之令具條官闕之成校最信然進秩宜爾支度要部比
勾劇曹乃至虞衡之司悉通辰象之應尚懷擢序勿替
厥修

吳授可金部員外郎制

敕具官某任宰旅之士稱公臣之良總振諸曹之綱習
知決事之目資有敏濟號為練更適者攷制九筵奉祀

五室惟禮文之繁縟經几案之推行令有先庚之明事
無愆素之闕肆勤可紀覃賞用優稍遷應宿之郎俾進
司金之秩往承襄渥益務恪恭

吳授可主客員外郎制

敕某朕用閏成之法稽官治之勞矧乃宰士之良任失
公府之重練更有補擢叙則宜以爾行義俱優力局參
敏選自銓流之美嘉其士矩之修真諸堂塗寵以朝秩
試右曹之劇則書案弗留委都目之繁則事條畢舉稽

歲庸而懋著閱府奏以叙陳較然宿勤協于攷法春官
有屬建禮為郎仍序貴臺之廷兼煥積星之位益圖慎
履用對遷恩

呂公弼可兵部員外郎制

敕某官著攷法雖審較于行能職重首曹亦參視于人
地以爾承世濟之善有德器之稱中握計籌外按使斧
臨劇煩而自若躬和粹而弗流選自省聯攝糾都獄雖
平反之尚淺在審克而則精更試之效已聞稍遷之典

惟舊姑寵七兵之秩用服一臺之華往服茂恩勉濟遠業

張環可兵部員外郎制

敕具官某夫振滯淹者所以圖官次之效獎沖退者所以厚天下之風伸以旌襄聳夫流蔽以爾敏文強識遠量直躬履通介而能全安醜夷而忘競善處其厚有隨和而弗珍能裁諸煩迎干鏌而立斷中秘入直外治數更久次而不改其常衆競而獨安于靜朕心嘉此議者

賢之特推躡等之恩用獎秉彝之操七兵之屬秩峻中
臺三吳之佳使優諸部尚繁舊貫勉緒成勞

徐宗況可兵部員外郎陳旭吳奎可起居舍人制
敕某等朕永思考道儀刑前王即路寢之秘嚴修合宮
之齋享率義而尊配典明德以薦馨香神靈居歆天人
合貺因以孚朝慶之典時則厚諫雷之臣以爾宗況行
義清修志力强正以爾旭夙識經遠學術研幽以爾奎
方潔無渝勁正不撓竝以瓊望而充本朝或嘗冠惠文

論事有切劑之益或入對制策納忠無回隱之私置之
諫垣補我闕職復能奮繇直道數進苦言逮齋被之陪
祠率嚴恭而服禮熙成受祉覃施澤勞入妙一臺進聯
二史往承茲渥益思而忠

張中庸可兵部員外郎高良夫可金部員外郎解
賓王可兵部郎中石揚休可祠部員外郎制

敕具官某朕格太室還祀明堂靡神不宗惟帝是饗至
陽顯見休景晏溫受茲元祺均爾庶位以明祝釐之美

不欲專之朕躬以爾等選自臺觀之華參裁都輦之劇
奉若吾語虔乃祠事靖共在列奏假無言詩不云乎奉
璋戕戕髦士攸宜疇茲成勞進爾茂秩柱史職雖峻臺
郎選亦清曠言四士之良竝從一等之泛益思自效其
在懋承

麻溫故可職方員外郎制

敕朕據閔成之法校吏治之最先期以勤遠急賞而勸
勞以爾某術學兼資質文參映躬清素之履服澹退之

尚潛在郎署曾醜夷之弗爭孤于守藩亦名教之為樂
宣我勤約之詔敷于豈弟之風條上計文覆應褒典亦
以久法是宜稍遷臺郎主于文書職方辨于圖志且獎
弱翁之行勿興顏駟之嗟

陳異可職方員外郎制

敕具官某夫寬柔以教者南方之俗安靜不苛者循吏
之治上計若最進秩宜優以爾擢從峻良乃服清素果
于從政篤在首公以中臺之秋聯委臨川之朱轂績效

著于列郡閭閻集于有司參校不誣擢叙為允進司方
志之掌居為名秩之華往佐夏官尚圖民瘼

凌景陽可職方員外郎制

敕具官某夫詳試政事稽參治狀因閏成以大比用最
法以次遷亶無遺勞姑用振滯以爾著南土之望服中
臺之員名有清文濟以美政來上滿計交應陟科稍遷
右曹且服前列臺郎漢制主作文書職方夏官掌領圖
志竝為名秩之美允宜才彥之居尚懋厥官往欽茲寵

謝頤素可職方員外郎趙慎微可比部員外郎王
得賢可虞部員外郎張擇仁可太常博士龔尚王
日宣竝可太子中舍人制

敕某等夫吏績成于外賞格著于中因闕閭之成勞速
置郵而傳命就用遷秩以明亟賞爾等資承吏幹之敏
參服王官之采肅將朝委領刺州疆或宣賦縣條或典
幹事局有寬平愛物之迹無煩苛朘民之譏列上計文
優中遷法臺職之劇則有主方貢司物計

案此下似脫
比部語句

惟山澤之大緊虞衡之掌至于奉常儀範承華僚選咸用流品之入差次名秩之除旌陟在茲欽祗無忽

李郊可駕部員外郎元絳可都官員外郎李頎可太常博士林盛可國子博士制

敕某等夫陟典之寬則才路無壅攷法之密則課目難究歲以為限時惟厥中以爾刻才敏政成習為吏之術以爾絳文清行茂贊治財之策以爾頎風業修舉所至有稱以爾盛吏文淹通號為無害竝條守宰之效參叙

吏度之勞治功較然恩典宜及承司駕中都之務進容
臺太學之聯竝為懋遷尚思來效

管朝宗可庫部員外郎徐峻可太常博士董壽范
存竝可殿中丞呂公垂可右贊善大夫李需趙昌
王乾祐竝可太子中舍人制

較某等書伐以期視成于閏攷合功令差進秩次使在
位者得以勸仰而有力者無所忽遺爾等或擢自秀科
或奮從力學亦階舊德之食參賦治民之經安靜無華

庶平有迹類上三年之計進稽六叙之文據法當遷在
賞宜信司甲待事抱範相儀尚丞典名物之煩儲寀通
表著之籍竝為朝選之美就服詔除之榮務推精誠勉
思政術

劉杞可都官員外郎制

敕某朕咨擇州將出賦朝經參置郎官遙承臺務差進
秩次褒勸治功以爾本庶茂之升資庸敏之用比更試
于煩事適假守于劉城政舉以修計上曰最義圖泛勸

法著稍遷擢之秋聯典我隸士尚謹循良之目以承甄寵之恩

錢括可都官員外郎張師臯可虞部員外郎制

敕某等夫堯之熙衆績則曰明試以功周之較羣吏則曰叙正其治咸所以攷政實辨才否然後論陟之也以爾括階仕科而尚風業以爾師臯任門籍而有幹資竝馴致周行亦更試煩事或臨淮之劇方駕倅車或砥柱之艱參督漕舸來上歲課胥協賞條都隸進聯澤虞陞

秩竝承省局之務且旌官闈之勞勉服恩章益敦士檢
楊中和可都官員外郎呂惟簡可司門郎中制

敕國家叙進庶工之才均用一閏之法雖閒劇之職不
類而褒勸之典略同以爾中和經術尤明行能兼美早
傳先王之業久居博士之講以爾惟簡承公族之舊稔
吏文之資或引疾養和請奉琳館或剖符治遠邈在銅
梁竝因官成差進郎秩典臨都隸之劇掌司門籥之嚴
就服稍遷之恩勿廢聿修之節

楊延可都官員外郎李唐卿可太常博士許立可

國子博士制

敕某等朕叙進羣治優先外勞施則勝平恩不遺遠爾等以力局之敏兼風矩之修服在王官參條吏職或前更邸肆之掌課有甚羸或分樹郡邑之風政號連最有司獻狀主計為言績計較然賞固宜爾中都擢序儀範典司至于庠學之聯竝為朝秩之美益思砥節尚勵忠勤

李及之可都官員外郎董沔可屯田員外郎范徽
之蔡準並可祕書丞制

敕某等夫砥石之設所以礪鋒鏑攷法之建所以聳行
能限年而升惟官是懋以爾及之性理明決資練更之
敏以爾沔風識幹舉參支度之劇徵之以名門之雋準
以幹時之良並奮繇藝文而更試風政休有最目宜應
陟書秋臺都隸之聯冬官墾屯之屬進丞祕局預班外
朝用服竝時之恩悉號清流之選益思淬琢胥服褒華

楊志可都官員外郎王正民可虞部員外郎呂協
可殿中丞李述可秘書丞制

敕國家振大小之職壹內外之治著定攷法申叙衆功
勞之弗遺善用是勸具官某等達于從政敏在首公或
關握守符或顯促漕舸近沂二河之險遠涉三湘之艱
陶穴古公之餘羅池柳侯之舊流風尚篤遺詠未衰雜
治厥官參茂乃績鉤校如法甄陟應條稍遷都隸之曹
超叙澤虞之職清臺第一尚局有升對丞郎署竝籍朝

聯各修庖俎之方彌慎簡書之訓

彭思永可都官員外郎劉述謝顗並可屯田員外郎柳三接可太常博士制

敕某等計年校課所以法一閏之成進秩叙勞所以聳羣吏之勸寧失于廣不傷其情以爾等並南金之英預臨軒之選或辭章典蔚或經術通明飭諸行能則體和而粹試之政事則財敏而通官成較然歲亦勞止通用前勤之叙竝從上秩之遷都隸秋聯屯墾冬屬逮于儀

絕之典竝為官制之佳咸慎爾修往副吾詔

危佑可都官員外郎李敏可虞部員外郎高靖可
太常博士張大受可殿中丞制

敕某等夫吏領外治歲有成庸若勞之弗圖則善何以
勸爾等或挾文儒之術或治刑名之書延登諸朝參試
以政外求郡邑之瘼上布闕庭之恩公力弗遺治迹可
尚閱其來伐應于陟科都隸澤虞曲臺盾省進承建禮
之務升叙班朝之華就服寵靈益修風業勉綏民隱善

持官箴

張士燮可都官員外郎李九言馬仲甫黃鑄竝可
屯田員外郎王仲可國子博士制

敕某等夫信賞則官政修舉勞則吏力奮誼存開勸法
在攷課以爾等或用才章之秀拔從時髦有以經術之
明取于家學亦藉舊德咸序治朝分乘倅車領治和壘
謹牢盆之出納總都吏之紀綱節皆素修才亦兼敏沛
然政舉第以職遷鈎校弗疑旌陟惟允進秋臺者以都

隸為峻陟郎省者以墾屯為初至于庠學之聯悉為朝
選之茂恩不妄施功以敏興勉而來勤對我斯寵

竇平可比部員外郎景融可太常博士制

敕某等有著在庭服勞于位或遠為邛笮之守或近倅
關隴之城對賦政條參閱計簿咸績成勞之最宜從攷
法之遷進司計于中臺典範儀于禮閣竝為茂秩往虔
吾恩

馬伸可比部員外郎陳益可國子博士制

敕某等朕沿功令之舊攷官治之成若乃倅列郡而有
勞宰東畿而能力申懋厥賞差進以秩爾等本食德之
起用治經之明入服朝聯更試吏事治有勤狀法得次
遷稍升比計之曹益寔博通之列進丞郎務往服教官
勿替厥修以虔褒寵

王稹可比部員外郎李祐之可水部員外郎毋湜
可屯田員外郎制

敕某等夫任外員之郎丞諸曹之務秋局比計額尸勾

法至于工起之屬則有掌河渠諸水領戶口墾田並為
右司之華咸慎南宮之選以爾等以藝文資術進服王
官以法律教條班行民政咸有可紀適觀厥成爰酬營
職之勞且示攷功之法舉用參職並列壹臺往祇蹤等
之恩益圖來治之美

周世南邢至竝可比部員外郎聶世卿可都官員
外郎石洵直可屯田員外郎制

敕某等文昌法宮積星郎位古之元士職在中臺若乃

掌都隸主勾計胥乃墾田之屬咸曰右曹之選今釐務雖廢而遷秩益榮爾等稔服吏資練更民治或班錄列城之詔或分駕別車之行績用自陳閔成可攷竝差進于前秩尚留試于外勞就虔吾恩勉思乃職

郭亨吳迪竝可比部員外郎馮溫舒可屯田員外郎張承懿可水部員外郎張仲莊可太常博士寇玘李咸熙張景純竝可國子博士制

敕某等昔堯以職而試臣漢用法而課吏咸責實以觀

效亦累優而取陟以爾等士矩尤飭吏文滋習謹政條
之賦則嚴而不苛裁事局之繁則敏而能力績成所治
章下有司較闕閱而信然稽功令而審若差進中臺之
秩參服上庠之聯資地本優儀品兼峻往踐乃職彌茂
爾勤

張道可屯田員外郎制

敕具官某國家均用一閏大比庶工所以旌吏勞而懋
官賞也以爾選自造秀濟以方潔參試以事果于從政

服在外朝之次相我曲臺之儀齋伐自陳司蒞且久有
嘉臨履之狀俾擢壘屯之曹初升中臺且應列宿茲惟
叙進之典往服稍遷之恩

吳伸可屯田員外郎制

敕某征算之法贍入縣官功令之條勸進吏力以爾本
髦彥之選資強濟之材百鍊不銷器業兼輶鼻資游刃
委算商車能柅下姦善集公利最效尤著計部列言合
賞格而有餘在陟恩而可愛從司蒞之相禮進起草之

為郎往服壻曹且信吾賞

呂公孺呂公著竝可屯田員外郎制

敕某等朕褒優治民詳慎課吏均用一閏參比衆功治
最必甄節廉者起爾等竝舊相之子濟名門之美率繇
科等之奮咸服吏資之敏耿純獲試郡之請仲舉被題
輿之招悉上計文交中褒典在勞可紀于法得遷郎有
壻屯之官時謂拜除之美謝去相絕初得握蘭足為競
爽之榮益敦清勵之志

王鼎鄭炳王微竝可屯田員外郎制

敕某等夫賞不失勸治功日興勞有所甄吏力彌奮限
年會課計最陟能所以旌已試之勤聳來者之進也以
爾鼎政有風迹以爾炳行無緇磷以爾微出名臣之門
服清德之訓竝班朝有素而居官可紀適因郡計之上
咸叙官治之成參覆有司胥應陟典宜踐中臺之局悉
置副郎之聯茲惟寵章以對嘉績無廢敦厲往服褒優
王中立可屯田員外郎李希逸可國子博士制

敕某等或策偃商之科或治臯蘇之律飭修士矩明習
吏資屢條民治之成寢服王官之次鞏洛都府門握左
符汧隴彊藩分駕別乘胥上勞攷參質有司灼著勤庸
差進美秩壑屯丞于部務博通領于儒林竝為儀品之
華尚敦風教之俗

趙誠可屯田員外郎黃炳宋宏竝可太常博士制
敕某等昔魏氏攷法用京房之遺意載在前史傷于至
密朕因二典之舊用三歲之比既簡且久有勞弗遺爾

等竝志行端修藝文參韞果于從政長于治民績用適
成代還居最質有司而不繆延便坐而與言急于信賞
勸諸勤能壅屯右曹臺美初拜縣蒞清局官重博士竝
佳時彥用沛朝榮尚慎周官之箴往服漢儀之選

張靖可屯田員外郎彭文紀崔鵠竝可殿中丞王
瑜可大理寺丞制

敕某等夫風化之原參寄守宰官賞之令博攷治功爾
等率奉詔書分長郡邑履尚簡素治乏煩苛居官有可

紀之能在法應當遷之典臺郎初拜以掣曹為佳盾局
稍遷得尚丞曰美胥洎法卿之屬尤為列寺之榮悉虔
吾恩無替乃職

張輿可屯田員外郎父保卿沈遵竝可殿中丞李
昭慶可太子中舍人制

敕某等朕稽勞類能博攷衆職限年增秩汎勸庶工爾
等用辭學之優或世資之舊進服王官之序屢試文吏
之煩闕握符書參布條教居官之迹可紀課吏之法當

遷第用厥勞差進以秩墾田司盾東省承華竝通文石之班往服治朝之寵益思自效無忘稍遷

薛仲簡可屯田員外郎蔣秘卜仲竝可太常博士

馬仲旦可殿中丞制

敕朕攷內外吏職算計見效累優以成陟急賞以申信故功懋者進而節廉者起具官某等或奮從造秀或蔭自官華竝服王官之箴咸從朝著之後更試政事參訪行能或典守列城流豈第之化或長治劇邑宣愛利之

風條上年庸中校吏迹在狀甚白于法宜遷超叙右曹
實壘屯戶口之賞稍遷禮閣有贊導乘輿之榮至于盾
省之聯竝號朝闈之美往祇渥茂勿廢操修

劉錫可虞部員外郎高賦可太常博士制

敕某等或治經階仕或論秀升科進序王官參佩朝紱
長治州任闕握郡條竝叙臨履之勞來援遷陟之典法
當差級歲已再周質諸有司則罔後殿宜承郎省之務
往踐儀臺之華離石近邊資中遠郡好為政事勤恤吏

金史卷之二十一
卷十五
民服我茂恩期爾來效

田化愚可虞部員外郎鄭偕可太常博士張當可

殿中丞制

敕某等夫守宰為任最親斯民政伐有成宜疇吾賞以
爾等或仕緣鄉物或進藉世資繇官次之累勤自朝聯
而進序劍外班政迹著不苛橐內字民文稱無害竝用
年勤之茂合于功懋之科升領澤虞典司儀範至于盾
省之屬竝為朝紱之華就祇臺恩尚圖官治

路綸可虞部員外郎汲熙載可太常博士裴見素
可國子博士馬璟可衛尉寺丞制

敕某等賓興以文入預吾彀或沿家學之進亦資世賞
之延稔服吏能分從官使闕掌郡佐參布縣條領算商
車通著最目有司覆實彝格應遷司訓虞典襄勤野
至于經序之選均為朝品之華當思力公勿為官忝

陳式劉充中蘇顥竝可虞部員外郎林克從可國
子博士呂規王宗古竝可殿中丞制

敕某等或經明家學或地襲世資操行既修風力兼敏
寢從吏事之試參服王官之聯分握左符按行別乘竝
宣寬大之詔綽有愛利之風列上勤庸胥合賞格差進
中臺之秩超敘上庠之資至于盾省之華竝為朝序之
美往虔茲寵用慎爾修

朱湜李隨竝可虞部員外郎劉襲禮可太常博士
黃淳朱處約竝可殿中丞張赴可太子中舍人制
敕某等詳試則吏職修叙進則官治勸攷課之法若天

下之砥石所以聳行義而激節廉也爾等或治經素明而食惟舊德或進以文雅而拔諸峻良參服王官分條民政歷三期而成最用羣吏之計治鈎覆中典差次命秩進山虞以承務陪野蒞而相儀盾省入丞儲禁升屬且申吾賞彌勸爾勞

武周可檢校水部員外郎制

敕其隨近藩之牒預幕府之籌叅畫有勞終更無缺來趨銓集援叙慶條宜寵臺員之名且申効演之信往服

裒渥勿廢清修

黃延慶可檢校水部員外郎充堂後官制

敕某稔聞幹用守在廉規服從相府之嚴主領右曹之劇案文尤習履尚兼修升次宰旅之聯用進堂塗之掌且疇勞課就服遷恩

吳世長可檢校水部員外郎充堂後官制

敕某材質謹良志用開敏服在相君之府齒于宰士之聯慎守箴規習知事典歷年霜而寢久屬府牘之條聞

有嘉列掾之良擢序右曹之長尚圖幹效取對褒遷

文恭集卷十五